

## SATITSUA ETA SATORRA



Satitsua ari zan  
soro on batian,  
arto landare jaten  
sarturik lur-pian;  
kaltia egiñ arren  
nekazariyari,  
esaten zuben:—Ez dit  
ajolikan neri  
bildur geigo ematen  
dit neri lurpian  
ibildutzen diranak  
ni beziñ gordian;  
bildurrez nabil beti  
noiz baño noiz emen,  
nauten arrapatuko  
arto zañak jaten;—  
satorra ere onen  
gisan zan arkitzen,  
ark ere landariak  
zituben zupatzen;  
bañan au ere oso  
beldurri izanik,  
ibiltzen zan ikaraz  
itz abek esanik:

—Lapurretan nabill ni  
bañan naiz izutzen,  
nola bakarrik beti  
ibildutzen naizen;—  
ontan topo egiñik  
biyak an batetan,  
oso ikaraturik  
geldi ziran bertan;  
batek bere artian  
esaten zuben au:  
—¡Ai! neriak egiñdu  
onechek ilko nau.—  
Bestiak ere onen  
gisa ziyon: —¡Ené!  
onek ez dit utziko  
ezer egin gabe...—  
Ala bata bestien  
beldurrez zeudela,  
diyo au satitsuak  
bestiari onla:  
—Badakit nere gisa  
beldurraz zaudela,  
bañan lapurretan ni  
bezin prest zerala;  
eta ni ere nola  
nabillen igualtsu  
zer egiñ bear degun  
arren adi zazu;  
nola biyak asmo bat  
daukagun artua,  
artzagun ondo biyak  
geren pekatua;  
obe degu elkarren  
laguntzan ibilli,  
beldur guchigo degu  
erukiko noski;  
eta izanik emen  
jankaya aukeran,

ja zer ederki biyak  
bizituko geran!...—  
Bañan biyak batian  
zeudela lurpian,  
achur bat sartu zuten  
bertara kolpian;  
eta bizkarren erdi  
erditik sarturik,  
gelditu ziran biyak  
an chirchillaturik.

. . . . .

Bazter galtzalle asko  
izanik munduan  
konpondutzen dirade  
bi-aben moduan;  
elkarren lagunkidan  
ibiltzen baitira,  
bañan azkenerako  
eroritzen dira.

JOSÉ ARTOLA.

